



Ils voluntaris ed ils asilants dil Löwenberg (davostier) che han eregiu la seiv

La tgira dils curtgins a Sagogn

DA ALOIS POLTERA

■ Dapi plirs onns s'engascha la Pro Sagogn denter auter per il manteniment dalla tschenta da pumera sut las duas parts dil vitg da Sagogn. Ils davos dus onns ha l'uniun, cun il consentiment dils proprietaris, tagliau pumera e plantau 21 enfiarlas. Plinavon ha ella raccoltau pliras tonnas meila e fatg must, meila turrada e differents vinars.

Ils 9 d'avrel 2018 ha la Pro Sagogn astgau schar pinar 39 pégnas blaus che eran vegni plantai entuorn ils 1970 agl ur dil Vitg dadens. Quels eran in tgerp jester els curtgins da pumera aulta. Leu ein usa plantadas enfiarlas, aschia che quei curtgin seprenta puspei en sia anteriura fuorma ed a siu nez d'antruras.

Igl onn vargau ha la Pro Sagogn entschiet a sclarir la pussevialadad d'ereger ina nova seiv sut ils curtgins dil Vitg dadens. Grondas parts da quellas seivs eran marschas ni donnegiadas fetg. Per realisar quei intent ha ei duvrau sclariments multifars, differents lubientschas d'uffecis e plenipotenzas da sedisch proprietaris. Nus vein vuliu far ina seiv tipica per nossa regiun, or da lenn e cun treis retschas d'aissas. Per la lunghezza dalla seiv da circa 530 meters ha ei duvrau varga 1.5 km aissas e circa 150 petgas. Las petgas ein vegnidas messas cun ina maschina speciala per far gardetschas. La maschina ha denton aunc stuiu vegnir midada giu empau per quei diever. Las ulteriuras lavurs ha la Pro Sagogn exequiu cun voluntaris e cun requirents d'asil dil center da transit Löwenberg a Schluein. Per levgiar las lavurs ha igl inventur Ernst Hess da Sagogn construuiu differents schablonas. Cun quellas e cun il grond engaschi dils gidonters ha la seiv saviu vegnir eregida el decuors da bien duas jamnas. Per prolungir la durabladad dalla seiv ei vegniu utilisau lenn larisch e sut mintga struba

ei vegniu piazzau cun ina pincetta ina rudiala da distanza per che l'aua stetti buca anavos vid il lenn e schmarscheschi quel. Grazia a quellas lavurs professiunalas spera la Pro Sagogn che la seiv tegni silmein 25 onns.

Ils cuosts totals da quei project, pia per pinar ed allontanar ils pégnas blaus, plantar enfiarlas da pumera aulta, allontanar la seiv veglia ed ereger la nova, muntan a circa 44'000 francs. Per garantir la finanziaziun ein vegni contactai differents uffecis e pliras instituziuns. Sper

la vischnaunca da Sagogn, igl Uffeci per la natira ed igl ambient GR, igl Uffeci d'agricultura e da geoinformaziun GR, la Tgira da monuments GR e la Greenstyle Foundation a Laax, han differents fautors privats empermess contribuziuns. Grazia a quels sustegnns san ils cuosts per ils possessurs vegnir sbassai.

Per quei project ein vegnidas impundidas cira 500 uras da lavur. La Pro Sagogn po cheutras schurmegiar considerablaimein la tschenta da pumera sut il Vitg dadens e meglierar il maletg dil vitg.



Ernst Hess cun ina da sias differents invenziuns per far la seiv



Part dalla seiv veglia sut la tschenta da pumera



Medema part suentar la renovaziun



Per l'entira seiv ha ei duvrau varga 1500 meters aissas da larisch e 150 petgas



Il president dalla Pro Sagogn ed organisatur dil project Luis Poltera



Las nuorsas han buca schau disturbar dallas enfiarlas

FOTOS MAD



Las petgas ein vegnidas messas cun ina maschina speciala per far gardetschas